

Rheoliadau a wnaed gan Weinidogion Cymru, a osodwyd gerbron Senedd Cymru o dan adran 45R o Ddeddf Iechyd y Cyhoedd (Rheoli Clefydau) 1984 (p. 22), i'w cymeradwyo drwy benderfyniad gan Senedd Cymru o fewn wyth niwrnod ar hugain gan ddechrau â'r diwrnod y gwneir yr offeryn, yn ddarostyngedig i'w estyn dros gyfnodau o ddiddymu neu doriad am fwy na phedwar diwrnod.

OFFERYNNAU STATUDOL
CYMRU

2021 Rhif 1363 (Cy. 358)

**IECHYD Y CYHOEDD,
CYMRU**

**Rheoliadau Diogelu Iechyd
(Cyfyngiadau Coronafeirws) (Rhif
5) (Cymru) (Diwygio) (Rhif 21)
2021**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae Rhan 2A o Ddeddf Iechyd y Cyhoedd (Rheoli Clefydau) 1984 yn galluogi Gweinidogion Cymru, drwy reoliadau, i wneud darpariaeth at ddiben atal, diogelu rhag, rheoli neu ddarparu ymateb iechyd y cyhoedd i fynychder neu ledaeniad haint neu halogiad yng Nghymru.

Mae'r Rheoliadau hyn wedi eu gwneud mewn ymateb i'r bygythiad difrifol ac uniongyrchol i iechyd y cyhoedd a berir gan fynychder a lledaeniad coronafeirws syndrom anadlol aciwt difrifol 2 (SARS-CoV-2) yng Nghymru.

Mae'r Rheoliadau hyn yn diwygio Rheoliadau Diogelu Iechyd (Cyfyngiadau Coronafeirws) (Rhif 5) (Cymru) 2020 (O.S. 2020/1609 (Cy. 335)) ("y prif Reoliadau") er mwyn—

- darparu, pan fo oedolyn wedi ei hysbysu ei fod wedi dod i gysylltiad agos â pherson sydd wedi cael canlyniad positif am y coronafeirws sy'n amrywiolyn Omicron, neu a all fod yn amrywiolyn Omicron, fod rhaid i'r oedolyn hunanynysu am nad yw'r esemptiadau yn y prif Reoliadau sy'n ymwneud â statws brechu,

treialon clinigol a chynlluniau profi yn gymwys mwyach;

- darparu (yn yr un modd), pan fo oedolyn wedi ei hysbysu bod plentyn y mae gan yr oedolyn gyfrifoldeb drosto wedi dod i gysylltiad agos â pherson sydd wedi cael canlyniad positif am y coronafeirws sy'n amrywiolyn Omicron, neu a all fod yn amrywiolyn Omicron, fod rhaid i'r plentyn hunanynysu;
- egluro bod “swyddog olrhain cysylltiadau”, at ddibenion rheoliadau 6 a 7 o'r prif Reoliadau, yn cynnwys Ymddiriedolaeth GIG Iechyd Cyhoeddus Cymru a'r Ysgrifennydd Gwladol fel y cânt hysbysu pobl am ganlyniadau profion positif.

Ystyriwyd Cod Ymarfer Gweinidogion Cymru ar gynnal Aseidiadau Effaith Rheoleiddiol mewn perthynas â'r Rheoliadau hyn. Yn unol â'r Cod, ni luniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn, oherwydd bod angen eu rhoi ar waith ar frys i ddelio â bygythiad difrifol ac uniongyrchol i iechyd y cyhoedd.

Rheoliadau a wnaed gan Weinidogion Cymru, a osodwyd gerbron Senedd Cymru o dan adran 45R o Ddeddf Iechyd y Cyhoedd (Rheoli Clefydau) 1984 (p. 22), i'w cymeradwyo drwy benderfyniad gan Senedd Cymru o fewn wyth niwrnod ar hugain gan ddechrau â'r diwrnod y gwneir yr offeryn, yn ddarostyngedig i'w estyn dros gyfnodau o ddiddymu neu doriad am fwy na phedwar diwrnod.

OFFERYNNAU STATUDOL
CYMRU

2021 Rhif 1363 (Cy. 358)

**IECHYD Y CYHOEDD,
CYMRU**

**Rheoliadau Diogelu Iechyd
(Cyfyngiadau Coronafeirws) (Rhif
5) (Cymru) (Diwygio) (Rhif 21)
2021**

Gwnaed am 1.12 p.m. ar 2 Rhagfyr 2021

*Gosodwyd gerbron Senedd
Cymru am 4.30 p.m. ar 2 Rhagfyr 2021*

Yn dod i rym 3 Rhagfyr 2021

Mae Gweinidogion Cymru yn gwneud y Rheoliadau a ganlyn drwy arfer y pwerau a roddir gan adrannau 45C(1) a (3)(c), 45F(2) a 45P(2) o Ddeddf Iechyd y Cyhoedd (Rheoli Clefydau) 1984(1).

Mae'r Rheoliadau hyn wedi eu gwneud mewn ymateb i'r bygythiad difrifol ac uniongyrchol i iechyd y cyhoedd a berir gan fynychder a lledaeniad coronafeirws syndrom anadlol aciwt difrifol 2 (SARS-CoV-2) yng Nghymru.

(1) 1984 p. 22. Mewnosodwyd adrannau 45C, 45F a 45P gan adran 129 o Ddeddf Iechyd a Gofal Cymdeithasol 2008 (p. 14). Mae'r swyddogaethau o dan yr adrannau hyn wedi eu rhoi i "the appropriate Minister" ("y Gweinidog priodol"). O dan adran 45T(6) o Ddeddf 1984, y Gweinidog priodol, o ran Cymru, yw Gweinidogion Cymru.

Mae Gweinidogion Cymru yn ystyried bod y cyfyngiadau a'r gofynion a osodir gan y Rheoliadau hyn yn gymesur â'r hyn y maent yn ceisio ei gyflawni, sef ymateb iechyd y cyhoedd i'r bygythiad hwnnw.

Yn unol ag adran 45R o'r Ddeddf honno, oherwydd brys, mae Gweinidogion Cymru o'r farn ei bod yn angenrheidiol gwneud yr offeryn hwn heb fod drafft wedi ei osod gerbron Senedd Cymru ac wedi ei gymeradwyo ganddi drwy benderfyniad.

Enwi a dod i rym

1.—(1) Enw'r Rheoliadau hyn yw Rheoliadau Diogelu Iechyd (Cyfyngiadau Coronafeirws) (Rhif 5) (Cymru) (Diwygio) (Rhif 21) 2021.

(2) Daw'r Rheoliadau hyn i rym ar 3 Rhagfyr 2021.

Diwygio Rheoliadau Diogelu Iechyd (Cyfyngiadau Coronafeirws) (Rhif 5) (Cymru) 2020

2.—(1) Mae Rheoliadau Diogelu Iechyd (Cyfyngiadau Coronafeirws) (Rhif 5) (Cymru) 2020⁽¹⁾ wedi eu diwygio fel a ganlyn.

(2) Yn rheoliad 5—

(a) ar ôl paragraff (1) mewnosoder—

“(1A) Yn y Rhan hon—

(a) ystyr “person y mae'r coronafeirws arno sy'n amrywiolyn Omicron neu a all fod yn amrywiolyn Omicron” yw—

(i) person sydd wedi cael canlyniad positif am y coronafeirws ac y mae profi moleciwlaidd (gan gynnwys profion PCR, genoteipio neu ddilyniannu) wedi nodi bod yr amrywiolyn Omicron ar y person, neu

(ii) person sydd wedi cael canlyniad positif am y coronafeirws ac y mae un o'r canlynol yn gymwys—

(aa) mae profi moleciwlaidd (gan gynnwys profion PCR, genoteipio neu ddilyniannu) wedi nodi ei bod yn

⁽¹⁾ O.S. 2020/1609 (Cy. 335) fel y'i diwygiwyd gan O.S. 2020/1610 (Cy. 336), O.S. 2020/1623 (Cy. 340), O.S. 2020/1645 (Cy. 345), O.S. 2021/20 (Cy. 7), O.S. 2021/46 (Cy. 10), O.S. 2021/57 (Cy. 13), O.S. 2021/66 (Cy. 15), O.S. 2021/95 (Cy. 26), O.S. 2021/103 (Cy. 28), O.S. 2021/172 (Cy. 40), O.S. 2021/210 (Cy. 52), O.S. 2021/307 (Cy. 79), O.S. 2021/413 (Cy. 133), O.S. 2021/502 (Cy. 150), O.S. 2021/542 (Cy. 154), O.S. 2021/583 (Cy. 160), O.S. 2021/668 (Cy. 169), O.S. 2021/686 (Cy. 172), O.S. 2021/722 (Cy. 183), O.S. 2021/862 (Cy. 201), O.S. 2021/925 (Cy. 210), O.S. 2021/970 (Cy. 228), O.S. 2021/1119 (Cy. 271), O.S. 2021/1131 (Cy. 274), O.S. 2021/1212 (Cy. 303) ac O.S. 2021/1304 (Cy. 334).

debygol bod yr amrywiolyn
Omicron ar y person, neu

(bb) mae'r amgylchiadau yn
golygu ei bod yn rhesymol i
swyddog olrhain
cysylltiadau amau bod yr
amrywiolyn Omicron ar y
person;

(b) ystyr "amrywiolyn Omicron" yw'r
amrywiolyn SARS-CoV-2 sydd wedi
ei ddynodi'n B.1.1.529 gan Sefydliad
Iechyd y Byd."

(b) ar ôl paragraff (4) mewnosoder—

"(5) At ddibenion rheoliadau 6 a 7, mae
"swyddog olrhain cysylltiadau" yn cynnwys—

(a) Ymddiriedolaeth Gwasanaeth Iechyd
Gwladol Iechyd Cyhoeddus Cymru;

(b) yr Ysgrifennydd Gwladol."

(3) O flaen rheoliad 10 mewnosoder—

**"Gofyniad i ynysu ar ôl cysylltiad agos â
pherson â'r amrywiolyn Omicron: plentyn**

9A.—(1) Mae'r rheoliad hwn yn gymwys pan
fo swyddog olrhain cysylltiadau yn hysbysu
oedolyn ("O") fod plentyn ("P") y mae O yn
gyfrifol amdano wedi dod i gysylltiad agos â
pherson ("C") y mae'r coronafeirws arno sy'n
amrywiolyn Omicron neu a all fod yn
amrywiolyn Omicron.

(2) Ni chaiff P ymadael â'r man lle y mae P
yn byw, neu fod y tu allan i'r man hwnnw, cyn
diwedd diwrnod olaf ynysiad P oni bai bod
rheoliad 10 yn gymwys.

(3) Os gofynnir iddo gan swyddog olrhain
cysylltiadau, rhaid i O hysbysu'r swyddog am
gyfeiriad y man lle y mae P yn byw.

(4) Diwrnod olaf ynysiad P yw diwrnod olaf y
cyfnod o 10 niwrnod sy'n dechrau â'r diwrnod
ar ôl y diwrnod y mae swyddog olrhain
cysylltiadau yn ei gofnodi fel y diwrnod olaf y
daeth P i gysylltiad agos ag C cyn i O gael yr
hysbysiad y cyfeirir ato ym mharagraff (1).

(5) Ond pan fo P yn byw yn yr un man ag C,
diwrnod olaf ynysiad P yw—

(a) pan fo C, neu, pan fo C yn blentyn,
oedolyn cyfrifol ("OC") ar ran C, yn
rhoi gwybod i swyddog olrhain
cysylltiadau y diwrnod y datblygodd C
symptomau gyntaf, diwrnod olaf y
cyfnod o 10 niwrnod sy'n dechrau â'r
diwrnod ar ôl y diwrnod y mae C, neu
OC, yn rhoi gwybod mai dyna'r

diwrnod y datblygodd C symptomau gyntaf, neu

- (b) pan na roddir gwybod am unrhyw symptomau, diwrnod olaf y cyfnod o 10 niwrnod sy'n dechrau â'r diwrnod ar ôl diwrnod y prawf a arweiniodd at roi'r hysbysiad i C, neu OC, fod C wedi cael canlyniad positif am y coronafeirws.”

(4) Yn rheoliad 10—

- (a) ym mharagraff (1), yn lle “neu 8(2)” rhodder “, 8(2) neu 9A(2)”;
- (b) ym mharagraff (3), yn lle “ac 8(2)” rhodder “, 8(2) a 9A(2)”;
- (c) ar ôl paragraff (6) mewnosoder—

“(6ZA) Ond nid yw paragraffau (5) a (6) yn gymwys pan fo'r swyddog olrhain cysylltiadau sy'n rhoi'r hysbysiad a ddisgrifir yn rheoliad 8(1) hefyd yn hysbysu'r person mai â pherson y mae'r coronafeirws arno sy'n amrywiolyn Omicron neu a all fod yn amrywiolyn Omicron yr oedd y cysylltiad agos.”

(5) Yn rheoliad 11, ar ôl paragraff (1) mewnosoder—

“(1A) Ond nid yw'r rheoliad hwn yn gymwys pan fo'r swyddog olrhain cysylltiadau sy'n rhoi'r hysbysiad a ddisgrifir yn rheoliad 8(1) hefyd yn hysbysu'r person mai â pherson y mae'r coronafeirws arno sy'n amrywiolyn Omicron neu a all fod yn amrywiolyn Omicron yr oedd y cysylltiad agos.”

(6) Yn rheoliad 12, ar ôl “reoliad 7(2)” mewnosoder “neu 9A(2)”.

(7) Yn rheoliad 13(1)(a), yn lle “neu 8(1)” rhodder “, 8(1) neu 9A(1)”.

(8) Ar ôl rheoliad 13 mewnosoder—

“Tynnu'n ôl hysbysiad mai â pherson y mae'r amrywiolyn Omicron arno yr oedd y cysylltiad agos

13A.—(1) Mae'r rheoliad hwn yn gymwys pan fo swyddog olrhain cysylltiadau—

- (a) wedi rhoi hysbysiad o dan reoliad 10(6ZA) neu 11(1A) mai â pherson y mae'r coronafeirws arno sy'n amrywiolyn Omicron neu a all fod yn amrywiolyn Omicron yr oedd cysylltiad agos person (“yr hysbysiad gwreiddiol”), ond
- (b) yn hysbysu derbynnydd yr hysbysiad gwreiddiol wedi hynny fod yr hysbysiad wedi ei dynnu'n ôl.

(2) Mae hysbysiad gwreiddiol i'w drin fel pe na bai wedi ei roi (a gall yr esemptiadau yn rheoliadau 10(5) a (6) ac 11 fod yn gymwys).”

(9) Yn rheoliad 14(2)(a)—

- (a) yn y geiriau o flaen paragraff (i), yn lle “neu 8(2)” rhodder “, 8(2) neu 9A(2)”;
- (b) ym mharagraff (ii), yn lle “neu 8(1)” rhodder “, 8(1) neu 9A(1)”;
- (c) ym mharagraff (iii), yn lle “neu 8” rhodder “, 8 neu 9A”.

(10) Yn rheoliad 30, yn y geiriau o flaen is-baragraff (a), yn lle “neu 8(2)” rhodder “, 8(2) neu 9A(2)”.

(11) Yn rheoliad 40—

- (a) ym mharagraff (1)—
 - (i) yn is-baragraff (a), ar ôl “8(2)” mewnosoder “, 9A(2)”;
 - (ii) yn is-baragraff (b), yn lle “neu 8(3)” rhodder “, 8(3) neu 9A(3)”;
- (b) ym mharagraff (2)(a), yn lle “neu 8(3)” rhodder “, 8(3) neu 9A(3)”.

Mark Drakeford

Y Prif Weinidog, un o Weinidogion Cymru

Am 1.12 p.m. ar 2 Rhagfyr 2021